



Akcija BUYER

TUŽILAŠTVO TRAŽI PRITVOR ZA ARSLANAGIĆA&COMP

• Uhapšeni i Hasan Sepe i Samir Telibečirović • Pritvor se traži i za osumnjičene Edina Arslanagića i Bojana Kebea

Hapšenjem Hasana Sepe i Samira Telibečirovića nastavljena je velika akcija BUYER, koju, po nalogu Kantonalnog tužilaštva Sarajeva, provodi Agencija za istrage i zaštitu uz saradnju sarajevskog kantonalnog MUP-a i Porezne uprave FBiH, a u kojoj su u srijedu uhapšeni Amar Arslanagić, Šefik Handžić, Aida Selvić, Izet Arslanagić i Jasmin Šepo.

Na redu Sud

Pored sedam do sada uhapšenih, za organizovani kriminal u Bosnalijeku u periodu od 2002. do 2012. godine težak više miliona KM osumnjičeni su i Edin Arslanagić, bivši dugogodišnji direktor Bosnalijeka, kao i Bojan Kebe, nekadašnji direktor za marketing Bosnalijeka. Tužilaštvo je za svih devet osumnjičenih jučer poslijepodne od Kantonalnog suda Sarajeva zatražilo jednomjesečni pritvor od dana hapšenja.

Uhapšena sedmorka jučer je i saslušana u Kantonalnom tužilaštvu u prisustvu njihovih advokata, a nakon čega je zatraženo pritvaranje. Kantonalni sud u roku od 24 sata treba odlučiti o zatraženom pritvoru.

Sedam uhapšenih, kao i Arslanagić stariji i Kebe osumnjičeni su za organizovani kriminal i to zloupotrebu položaja ili ovlasti, poresku utaju, krivotvorenje službene isprave i sklapanje štetnog ugovora. Akciji hapšenja prethodila je višemjesečna složena kriminalistička istraga u okviru koje je, prema saopštenju iz SIPA, dokumentiran niz nezakonitosti u Bosnalijeku, a prilikom obavljenih pretresa pronađena je i dokumentacija i drugi predmeti koji mogu poslužiti kao dokazi u daljnjem postupku.

Javnost je kroz brojna medijska istraživanja o kriminalu u Bosnalijeku već odavno upoznata o basnoslovnom bogatstvu kako Arslanagića, tako i njima najbližih saradnika.

Tri Arslanagića, dvojica Šepa, Handžić, Kebe, Selvić i Telibečirović su kao organizovana grupa počinili više krivičnih djela, te kao uposlenici firmi Bosnalijek, Brštanica i Carpe Diem Bosnalijek, Federaciju BiH i Budžet KS-a oštetili za milionske iznose.

Pisali smo u nekoliko navrata da je Amar Arslanagić bio jedan od direktora u Bosnalijeku, a u januaru ove godine je na Kantonalnom sudu osuđen za pronevjeru i zloupotrebu više od 70.000 KM Bosnalijeka koje je trošio u privatne svrhe.

Firma Brštanica, inače vlasništvo Šepe, kroz svoj restoran nudila je usluge toplog obroka radnicima Bosnalijeka, ali naplata tih usluga nije bila zakonita. Naplaćivano je puno više nego li su radnici Bosnalijeka jeli. Ova firma je organizovala i zakuške i koktele za Bosnalijek po istom principu. Na fakturama sa Brštanicom radila je Selvićka. Kompanija Carpe Diem organizovala je prevoz uposlenih u Bosnalijeku.

Kupovina dionica

Među onima koji su godinama ukazivali na kriminal u Bosnalijeku i oko Bosnalijeka, posljednje akcije Tužilaštva i policije komentarišu se kao nada u pravdu, ali istovremeno i očekivanje da će se kriminal koji je nastavljen poslije 2012. godine i koji uključuje i Hadenovo osvajanje većinskog dijela dionica Bosnalijeka također biti raspetljan. Tužilaštvo BiH, kao što je poznato, već mjesecima vodi is-

tražne radnje upravo oko trgovine dionicama Bosnalijeka na Sarajevskoj berzi, koja je obavljena preko Brokerske kuće Eurohaus i Zijada Blekića.

M. ĐUROVIĆ RUKAVINA

ORGANIZOVANI KRIMINAL

Sedam uhapšenih, kao i Arslanagić stariji i Kebe osumnjičeni su za organizovani kriminal i to zloupotrebu položaja ili ovlasti poresku utaju, krivotvorenje službene isprave i sklapanje štetnog ugovora



Edin Arslanagić: Vrh piramide



Bojan Kebe: Među osumnjičenima